



寒松堂全集目錄 卷之二

奏疏 吏科 詹事府 光祿寺

明 計典以清吏治復舊治以肅人心等事疏

糾拾關朝 覲大典等事疏

恭陳用人第一大政等事疏

卓異之名實易淆等事疏

申未明之職掌以廣 聖恩等事疏

微臣就職言職以明職業等事疏

遵 旨奏明事疏

體 聖主難慎之心謬獻條陳等事疏



奏明臣未畫題緣由事疏

督撫關係封疆告病例當代 請等事疏

部司擅委中軍大乖典制等事疏

檢舉錯誤事疏

詳奏臣科始末仰乞 聖鑒等事疏

應推督撫官員吏部宜遵 聖諭等事疏

游僧干求書文有犯法紀等事疏

恭陳四款以佐 聖主勤民大政事疏

俯陳愚見推廣 皇仁事疏

遵 諭回奏事疏

臣母抱病日久謹陳下情等事疏

首疏遵 諭詳陳治平之大綱等事疏

次疏恭陳薦舉各官格式等事疏

三疏恭陳拯救兵民之節目等事疏

臣母年老病深比例籲 恩終養等事疏

寒松堂全集卷之二

蔚州魏象樞環溪著

奏疏

吏科 詹事府 光祿寺

吏科都給事中臣魏象樞謹

題為明

計典以清吏治復舊治以肅人心謹獻芻言仰佐
新政事臣惟人君御世之權莫大於賞善罰惡國家
察吏之典不外乎黜幽陟明故虞廷考三載之
績周官垂六計之法典甚重也我

朝兩次展

覲方在

定鼎之初進退固嚴規制未備雖抒萬國拜舞之心猶缺

御前考察之事今值

皇上躬親大政首舉

計典明一代之令甲所以立萬禩之章程大非從前草創可比者臣爰考舊章切思三年朝覲義取述職其名爲大計者乃天子自計天下官員之賢否令部院科道諸臣分理而共佐者也即如御前有奏大班有劾總職者有免冠之責復

任者有戒飭之勅廉能超衆則面加獎賞地方利弊則各許奏陳載在會典班班可按前此皆未行之今若嚴慎之心有加澄清之效益著苟令入

覲諸臣不聆

天言之赫弈尤非所以勸懲天下也臣謂鱗集

闕下者布按二司實爲百官綱領兩司稱職則道府州縣可知也恭請

皇上面召各直省兩司等官問水旱頻仍有無救濟招徠所報地荒丁逃者誰爲致之問錢糧混冒

官侵吏肥每至數百餘萬者誰爲掌之問劣員
訕課蠹國久列優評者誰爲縱之問款項混開
徵解淆亂賦役全書屢飭不定者誰爲司之問
地方有藐法行私縱賊窩盜罪害及於職官百
姓者誰爲制之問法律不明任情出入人罪者
誰爲議之問

欽案沉閣久不完結者誰爲諉之問奸蠹盜折官糧
成千成萬弊由夤謀濫委者誰爲主之凡三年
中國賦之盈縮民命之生死官評吏議之是非
公私關係大綱者逐一面

奏稱職者作何獎賞不稱職者作何處分庶足爲
表率百僚之戒倘有支吾欺飾容科道官以白
簡隨之款款糾駁以服其心俾郡邑小吏咫尺
天威惕然於

雷霆雨露之下自返職業圖報
朝廷仰見

盛世之

計典昭明海內之人心鼓勵即千萬世永爲遵奉
矣臣蒙

聖恩補列首垣在吏言吏伏候

特旨乾斷施行謹題請

旨奉

聖旨著速議具奏該部院知道

吏科都給事中臣魏象樞謹

題爲糾拾關朝

覲大典既明必不敢廢之職掌當去必不可仍之弊

端恭請

勅議良法永爲遵守事切照三年

大計冊報責在撫按考察責在部院糾拾責在科

道總爲仰佐

重典以澄清天下之吏治也臣查四年科道拾遺

曾經舉行因立法不善科道被處者不一而足

即臣衙門如劉捷以糾拾張守廉責革楊時化

以糾拾左光先降級劉鴻儒以糾拾勞有學降級林起龍以糾拾楊雲鶴革職楊璜以糾拾劉孔敏罰俸而臺臣尚不與焉臣攷之典章原用科道以彈劾有司非借有司以處分科道也又因撫按之耳目有遺廣之科道非因科道之糾拾有據遂咎撫按也乃科道以進言受累者弊有數端大約糾拾之單款與撫按冊報相左故撫按恐蹈徇縱之愆不得不代尋出脫之法以故巧爲遮蓋款款子虛甚有看語內比之文王孔子者此一弊也又所糾之官不行革職仍以

見任質審百姓衙役尚屬管轄斷無供証贓私之理此二弊也會典所載科道官必待吏部考察後有失當方許指名糾劾竝無處分科道一字而降革責罰反坐言官不合典例此三弊也且當日察審單款之無據者撫按也乃案墨未乾而所叅左光先等貪婪不法革職提問者亦撫按也豈廉於前而貪於後乎抑初甚賢而繼不肖乎則科臣之指叅非誣撫按之解脫益明矣總因四年

計典初舉

皇上未親大政公道未章事多草率今值

聖政方新之時從前弊端不除則諸臣職掌不盡諸

臣職掌不盡則墨官遺漏必多况諮訪既奉有
不行之

旨拾遺一節尤爲緊要不可不力爲舉行者臣查得
四年銓部所陳

計典一疏內開我

朝鼎新創舉一應考察事宜且照舊例舉行一次倘
其中有應革應因者再行斟酌今若不遵舊典
而革前弊不足以立萬世之良法也至於被糾

官員或本身有贓或衙役有贓或才調庸常或
性情乖戾自應照例處分議罪外如果審無贓
過應否還職竝聽部議自不得藉端誣罔處分
科道以負

皇上求言察吏之意卽科道諸臣自盡厥職倍加公
慎無敢有畏罪塞責之心庶

大典有光而貪風可息矣臣繕疏已畢見掌道臣
朱鼎延請復拾遺之例微臣竝指四年拾遺之
弊伏乞

勅下部院一併確議永爲遵守施行謹題請

肯奉

聖旨據奏四年糾拾反坐言官有壞吏治塞言路以後科道糾拾官員照大計一例處分科道官有挾私妄糾的著吏部都察院指實叅奏該部院知道

吏科都給事中臣魏象樞謹

題爲恭陳用人第一大政以佐治平之實效以報一體之

隆恩事臣惟上行下濟大易著泰交之文君明臣良尚書賡喜起之盛歷漢唐宋元而上一心一德相得益章史冊中蓋不多見也昨逢元旦傳奉溫綸召內三院引九卿詹事府國子監都給事中掌道御史等官

特宴於

保和殿臣適以青瑣末員遭逢

異數

問地問年躬承

天語

賜餽賜飲喜動

龍顏都俞一堂賡歌千載嗣於初三日接滿漢官叅
同奏事之

上傳又於初四日捧言官條奏多係細務之

聖諭仰見我

皇上愛人知人洵與堯舜同揆矣臣切思

國家第一大政莫大於用人但

上天之生才有數全恃

皇上培植而辨論之以待一日之用故用之有效也
語云十年之計樹木百年之計樹人今滿臣甫
停戰伐講求治平非厚加培植則舊人有零落
之憂漢臣叅同奏事

顧問方殷因事察人辨論於蚤倘異日部院有缺
皇上預知某臣之心地精明堪進何職某臣之事務
熟鍊堪進何職某臣之厚重少文堪進何職某
臣之風裁出衆堪進何職叅以衆議簡在
帝心

社稷所關得人不可偶非資序之淺深可拘也若總督撫按均係重臣但總督封疆之任與撫臣兼吏治民生者不同近日總督於京堂舊人及在外巡撫提督中推用是矣獨巡撫缺出推京堂者少而推布按者多臣有兩說於此巡撫固需歷練之才京堂亦是切要之地若盡推外任誰辦部院之事布按既儲為巡撫之用自宜選材而授苟錢穀有玷而居方伯律例不明而居臬憲職任尚且難堪節鉞必無厚望臣請

皇上察新舊按臣中真才真品有守有為果能興利除害不愧察吏安民者或三差俱完或兩差無疵書名

御屏

命廷臣一例同推巡撫苟可得人何惜不次之擢至於布按二司有缺吏部仍照會典舊例推列正陪請

旨點用可為今日之布按方可為異日之巡撫臣所謂培植而辨論之者不獨為一事言矣內外得人同心奏效治平之本莫大於此伏乞

聖明採擇施行謹題請

旨奉

聖旨著確議具奏該部院知道

吏科都給事中臣魏象樞謹

題爲卓異之名實易淆

聖朝之拔擢貴慎謹陳愚見以錄真才以佐澄清事
切惟三年計吏名曰考績蓋考察政績之成與
不成以行

朝廷黜陟之大法也臣濫隨各衙門閱冊之後得與
滿漢諸臣同心叅核事必求其實法必求其平
竊愧於

皇上黜幽之大典不能仰副萬一敢言陟明乎臣查
舊例各撫按爰有卓異之舉大抵於道府州縣

中拔其品行卓越政績異常者舉數人以報
天子獎賞紀擢我

朝行之至再矣臣詳攷其義今之所謂卓異卽漢之
所謂治行第一也不懸天下非常之格不能得
天下非常之士朱邑爲北海太守以廉平不苛
愛利爲行人爲大司農卓茂爲密邑令以教化
大行道不拾遺遷京部丞黃霸爲潁川太守以
先教後罰姦盜屏徙徵爲京兆尹召信臣爲南
陽太守以訓農興利戶口倍增召爲少府史書
所載指不勝屈古之視吏治也其重如此我

皇上大政方新首舉廉卓鼓舞激勸正在於斯且
萬幾日御諸務

親裁此事三年一舉豈尋常薦剡可比上而
朝廷著得人之令下而部院盡知人之明卓求真卓
必有賢聲異求真異必有實政今查各直省冊
開卓異官員事實有據者固多平常無奇者不
少雖赫赫之名見於久去而泛泛之譽豈是定
評卓異之選誠未可以濫邀也臣請

勅下部院將舉到卓異官員所開事蹟諸字推敲嚴
加品題以實政可指功蹟超衆者分爲一等以

治業平常僅能稱職者分爲一等其姓名事實俱用滿漢兼字開進

睿覽

御筆親定獎賞之後各照實蹟分別優擢勿使旣膺循卓之典仍滯常格之中舉一真才而天下之才皆勸擢一廉吏而天下之吏皆服庶見

國家磨勵人才務求實用吏治民生良有裨益卽兩漢盛事不能專美於前矣謹題請

旨奉

聖旨這所奏卓異官必確求真才實用有裨吏治着

即嚴核行該部院知道

吏科都給事中臣魏象樞謹

題爲申未明之職掌以廣

聖恩以佐銓政事臣新任吏垣查憑限一節屬在職掌例之所有臣固不敢濫爲更張若使地方不獲人材之益人材先受地方之過亦臣之所爲怍怍懼也謹列四款爲我

皇上陳之

一官員領憑臣科定限向來滿漢同理止用漢字查近日各衙門行移俱用滿漢兼字文憑重事何獨不然臣謂今後部科俱用滿漢字

定可掛號以防假偽

一憑限日期查照官制每日以六十里為定恐有規避仍立法繩之今處分之法部臣已從寬矣各官願叨一命之榮肯有逗遛之意但水陸間關之中或風濤有阻或盜賊無常或資斧告艱或僕馬多故或便道辭親或攜家就養萬一迂遲難免降罰况雜職無級可降即行革職俾地方終不得一官之用者臣科之咎也臣謂處分之法自宜照例而定限期不妨稍寬今擬知縣以上每應限一月者

宜量展十日其佐貳首領教職驛巡大使等官出身寒微行李蕭然策蹇而行者有之徒步而往者有之艱苦與道府州縣不同責任亦與道府州縣不同每應限一月者亦量展十五日倘仍有逾限淹留託故告改者臣當以白簡從事情法既已允協民社亦無久悞前吏部因教官寒苦移會臣科頗有同心皆仰體

聖恩以示寬大

一領憑官員遵限赴任實為地方之益臣科滿

漢官於本月初一日畫憑有湖廣會同等縣知縣孫如周等呈稟地方現在用兵尚苦無任可到討寬限期等語臣思

王師遠征蕩平立奏印官不到誰人料理如果恢剿未及伏莽未靖數千里外臣亦不能遙度而槩寬也今後凡遇用兵地方許令部選官員到省驗憑投見撫按具疏

題明以該地方平定之日催令赴任緩急遲速一聽撫按限之切念從前有用之材或違限而斥或遇賊而死負

朝廷之培植勞部臣之銓除者不知凡幾誰爲雪之誰爲卹之哉臣讀

聖諭有曰國家愛惜牧民之官夫愛惜而不肯輕用必愛惜而不肯輕棄應

勅各督撫按如有未定地方一體遵奉以重人材

一雜職官員舊例內外各衙門吏農考滿部科查對然後選授給憑惟恐易於假冒近見吏部有查拿假官一疏內具假憑四張部科印信俱係私造雖奸胆包天無所不爲皆因撫按報缺稽遲部臣無由察核故久假而不歸

也今後凡雜職員缺毋拘揭報之例定須每季詳察具疏奏報內外互稽魍魎自遁且臣閱

大計冊中各省缺員十之六七內有假官註考者有同名竝到者有携印脫逃者有議缺當裁者臣曾與考功按冊面講部臣自行嚴查外其現缺若干宜刻期速補以絕奸弊

以上四款皆就臣職掌之一節而推言之其於人材地方果否有裨

聖恩銓政果否無碍伏乞

勅下吏部確議速覆臣科以便遵奉施行謹題請
旨奉

聖旨着確議具奏吏部知道

吏科都給事中臣魏象樞謹

題爲微臣就職言職以明職業以求實濟事切惟懸軫設鐸帝王之盛心補闕拾遺臣子之大義古來上有明主下有直臣或旌讜論於當時或表忠言於事後美蹟彰彰載在史冊近者

綸音再下

省躬求言令諸臣各抒所見一

諭曰曠廢職業又

諭曰無濟實事臣循分自省言責大虧稍有良心能無汗愧此時若不明其職業而求其實濟則諸

臣愈負

皇上納諫之心

皇上亦無從收諸臣建白之效誠如

上傳所謂當言不言不當言而言者也臣切思言官
以進言爲職

皇上以開言路爲心向來言有可行者

皇上未嘗不採其言言有不可行者

皇上亦未嘗重棄其人所以滿漢之臣大作敢言之
氣近日見有一言不當而問擬大辟者律以人
臣之道重

君父原不重身家計蒼生原不計禍福但恐言路諸
臣明知言者得罪不言者無罪各懷顧忌甘自
類於寒蟬委是鋪張尚欲託於鳴鳳以惴惴畏
罪之心結成鬱鬱緘口之象亦言路之大可羞
也夫人臣之罪洵莫大於懷偏私重賄賂若一
言不當而可擬重辟何以處臣下之貪贓壞法
報怨挾仇者乎臣謂

盛世之法貴持其平良臣之言務求其實古人有
云爲治不在多言顧力行何如耳糾彈勿避要
津大惡大貪劾一人而已見風節條陳不取累

續大利大害舉一事而尤勝雷同其有立意舍
糊屬辭枝蔓言之則利多而害少行之則利少
而害多此不職之臣也

明旨批下吏部以考功之法處之如係坐而言起而
可行之事內外務在實行大小各有實濟部臣
既券之於始

皇上仍課之於終孰敢苟掇浮議漫草彈章以自取
溺職之咎耶今後臣衙門仰體

聖懷叅攷舊例以進言之有濟無濟見言官之有才
無才其應內外遷轉者兼查職業明咨吏部此

外果有貪贓壞法報怨挾仇等弊或本衙門互
相察舉或該部院特疏糾叅情弊昭彰供証明
白此不法之臣也

明旨批下刑部以司寇之法罪之法歸於平言歸於
實凡語過戇而心無私者不必槩送刑部從此
上以實求下以實應不但沽名釣譽者各見其忠良
卽持祿養交者亦生其志氣用言與用人俱效
小利合大利兼收法紀當而職業明其所裨於
聖治者匪淺鮮矣謹題請

旨奉

聖旨覽這本內云人臣之道重君父原不重身家又云懷偏私重賄賂報怨挾仇者何以處之等語所指何人着魏象樞據實詳明奏來該部知道

吏科都給事中臣魏象樞謹

題爲遵

旨奏明事臣於本月初一日具有微臣就職言職以明職業以求實濟一疏初二日奉

聖旨覽這本內云人臣之道重君父原不重身家又云懷偏私重賄賂報怨挾仇者何以處之等語所指何人著魏象樞據實詳明奏來該部知道臣捧讀

天語仰見我

皇上俯採芻蕘雖條奏本章亦必字字求實

堯舜之心不是過矣臣疏所奏原因四月十七日接
得

上傳內有當言不言不當言而言無濟於實事之
諭臣切思言官有何實事可報

皇上不過進言得當耳前日言官吳達吳拜因進言
不當俱擬死罪臣敢言之才不及二臣尸位素
餐實深恐懼今見我

皇上省躬改過責望直臣臣所以言人臣之道重
君父原不重身家等語蓋欲人臣披肝瀝膽以事
一人寧可因言而得罪不可畏罪而廢言古人云怕

死非忠臣臣以此自勉併以勉言路諸臣實無
所指也又因

上傳內有大小臣工懷偏私重賄賂不實心爲國曠
廢職業之

諭臣切思言官何爲職業不愧

朝廷之耳目是其職業也言官而懷偏私何以糾報
怨挾仇之人言官而受賄賂何以察貪贓壞法
之事如有此等所犯大爲不法當下刑部議罪
若進言不當特不稱其職耳亦下刑部議罪法
之輕重未得其平也且

皇上爲諸臣之父母父母因不孝而欲議殺其子者
有之未有因失言而欲議殺者臣所以言人臣
之罪洵莫大於懷偏私重賄賂報怨挾仇者何
以處之等語蓋謂

皇上旣下求言之

諭今後凡有不法者應下刑部議罪其不職者止下
吏部處分定爲良法昭示臣工言路通塞之大
關史書紀載之美事莫切於此臣如有所指之
人真見真聞卽特疏入
告矣豈敢待

皇上詰問而後指名况臣原疏中明有立意含糊屬
辭枝蔓之戒臣欲戒人而先不自戒臣罪滋大
臣斷不敢也謹據實詳明回奏伏候

聖明鑒察貼黃難盡併乞

慈宥施行臣不勝戰慄待

命之至謹題請

旨奉

聖旨魏象樞所奏情詞已知道了以後言官進言凡
有實據的都要明白指奏何必分別小臣大臣含
糊影射着通飭行該部知道

吏科都給事中臣魏象樞謹

題爲體

聖主難慎之心謬獻條陳仰祈

採擇事臣待罪吏垣屢讀

明旨惓惓以察吏用人爲重臣雖愚昧寡識不諳銓

政聊就

明旨一推廣言之一讀

聖旨云地方好官若不薦舉上何由知以後各督撫
薦舉俱著遵奉

前旨是舉劾之責督撫所不能辭矣夫督撫止有歲

終甄別之例向來直省等處有循而行之者陝西等處有久而未行者北直山西等處有止及道府者宣大等處有兼及有司者均是督撫而各持一例於法不可

皇上方欲澄清吏治自司道以下佐貳教官以上或通行甄別或另行舉劾早宜

勅定勿致參差以後務將司道府廳原開考語全列疏中部院科道訪有不當者以便指名駁叅庶是非毀譽罔敢欺朦矣伏候

聖裁一外官陞轉挨俸論薦部臣極其詳慎臣常慮俸薦備者錢糧未必盡完錢糧完者俸薦未必全備况今薦額日嚴薦牘日少從前之有薦者尚可挨陞此後之應陞者何爲確據今應將給由考滿事例遵照前

旨著實舉行考任內之實蹟去紙上之虛文操守政事既可確見其短長稱職平常亦可分別而陞敘前經

題明以

皇上親政之年爲始歷俸三年依例考滿但錢糧隨俸計算或截算八年以後之俸或通算八年以

前之俸議定畫一通

勅各督撫轉行所屬應與給由者不許朦隱扶同亦不許留難稽滯本冊文移各註申考駁察月日旨下該衙門會同磨勘次第覈覆至布按二司一爲錢糧之統匯一爲刑名之大綱尤當嚴覈以正本原庶互保同結非爲故事矣伏候

聖裁一讀

聖旨云若用卓異必須在京堂上官有保結的方許推用仰見

皇上愛惜人才之心欲盡謂之賢旣恐以人而冒

盛典欲盡謂之不肖又恐以

盛典而棄人臣思聞見親切莫如本管上司萬一京堂之風聞不敢輕保則蘇松之缺難以久懸卓異之官難以槩棄此際何所適從乎夫用人之道慎終不如慎始卓異三年一舉原從千百人中覈其才守拔其二三較循例之薦舉何其重也向來撫按止以一冊開報全不具疏

題奏才守實蹟何嘗上

聞即連保之法未經

題明者臣亦不敢苛論今後督撫遇

大計之年務將卓異官姓名實蹟會疏特舉不必沿冊報之陋規所舉當則與卓異同其賞所舉不當則併道府同其罪庶信賞必罰可期得人矣伏候

聖裁以上三款如有一二可採伏乞
勅部確議上

請施行條奏字數溢額併乞

聖明鑒宥謹題請

旨奉

聖旨該部確議具奏

吏科都給事中臣魏象樞謹

題爲

奏明臣未畫題緣由事本月初一日吏部聚集九卿科道會推南贛巡撫正推者乃江南左布政使劉漢祚也滿漢諸臣爲地擇人自有所取但臣曾因錢糧一事具疏題叅前後不便互異是以未敢畫題理合

奏明伏乞

聖鑒施行謹題請

旨奉

聖旨知道了該部知道

吏科都給事中臣魏象樞謹

題爲督撫關係封疆告病例當代
請伏乞

明旨申飭免致貽誤地方事臣惟

國家之務莫大於封疆封疆之任莫重於督撫蓋
糧餉兵民安危治亂之大綱繫焉文移一日不
理則案牘遲壅耳目一處不周則弊端叢積無
病而控辭非臣子之義也有病而卧理亦非地
方之福也臣見向來撫臣告病如趙兆麟劉武
元周文燁等俱係自疏陳奏奉

旨以後必須具題行查再題再覆而後出缺推補在部臣固爲慎重但一查非數月不能結局一推非數月不能履任以多事之封疆姑託抱病之節鉞於地方殊有未便也况今刑名吏治歸併料理事務更煩責任倍重有病之人精神必減即事事周密保無一事之疎虞念念擔承保無一念之旁貸乎臣於此不能不鯁鯁過慮也查會典內所載各邊督撫患病不許自奏聽巡按御史勘明轉奏今巡按已經止息合無督臣有病許撫臣勘明代奏撫臣有病許督臣勘明代

奏無論邊省通爲定例應留應去取自

上裁既不致月復一月之耽延並不煩一疏再疏之紛擾封疆事重庶無萬一之誤也至於方面等官表率屬僚實爲緊要倘有病廢不堪者該督撫照例查奏若姑容戀棧部院科道訪實指叅重治督撫之咎所裨地方匪渺小矣臣在吏言吏伏乞

聖明採擇施行謹題請

旨奉

聖旨該部察例具奏

吏科都給事中臣魏象樞謹

題爲部司擅委中軍大軍典制請重處以儆將來
事切照私委之弊害民蠹國我

皇上禁革甚嚴卽地方額員有缺例於部選職官中
選委未聞部司設有中軍私牌擅自委用如主
事錢受祺者則大可異也查中軍一官原爲傳
宣軍令叅贊兵機而設兼有分統標下兵馬之
任所以督撫兵巡等衙門非部推中軍不敢用
雖其愛功名而奉約束而不肖之生事害人者
尚比比入

寒松堂全集
告也今受祺一奉差主事耳既無傳宣之軍令又無叅贊之兵機一兵一馬毫無干涉私委中軍意欲何爲非藉爲剝民之爪牙卽用爲通路之線索此不問而可思者但受祺與吳玉臣未委之先因何知識給牌之際憑何勞蹟既委之後盡何職業在差之日駐何衙門臣實不能爲受祺解案查各差私收人役

上傳有禁且柳寅東以撫臣而輕用一弁曩曾重處之受祺抑何膽大如斗而毫無顧忌也前吏部候三法司題覆再議今三法司俱經核實奏明

矣伏乞

勅下吏部嚴究根由有無賄託重加處分以爲後日招納奸徒剝軍害商之戒今後各部考核司官及各督撫查核道將凡有濫委縱害情弊者定從劣考統惟

聖明嚴飭施行謹題請

旨奉

聖旨部司擅委中軍殊屬違例錢受祺着議奏該部知道

吏科都給事中臣魏象樞謹

題爲檢舉錯誤事臣於本月初八日具有部司擅
委中軍一疏昨臣在科查發外抄見三法司核
覆疏內俱云錢受祺私委捕官臣疏將捕官二
字誤寫中軍自知粗疎理合檢舉請

旨改正仰乞

聖明鑒宥施行謹具奏

聞奉

聖旨叅疏原當詳慎捕官中軍輕重有別魏象樞何
得誤寫着議奏該部知道

吏科都給事中臣魏象樞謹

題爲詳奏臣科始末仰乞

聖鑒併陳科臣挾恨之情以明

國法事臣於本月二十一日在科辦事見臣同官

陳調元叅臣一疏奉

聖旨這本內事情着吏部都察院詳察確議具奏欽
此臣自當靜聽察議但臣科始末不敢不仰陳
於

皇上之前查臣科左給事中杜篤祐於六月初一日
吏部覆准奉

旨給假六箇月本內無開缺另補字樣及六月十五日吏部題覆陳調元疏看語內引會典題放事例凡給假官應照例作缺竝無姚文然杜篤祐姓名及科臣爲始等語滿洲臣與臣細繹凡之一字未知果否兼前後而言兢兢詳慎恐與調元原疏不侔隨令他赤哈哈方常書到部問名杜篤祐是出缺不是吏部回說以後的出缺杜篤祐不出缺而調元捏臣科爲立志背

旨非妄言乎臣科於閏六月初八日因咨劉捷等陞補又將杜篤祐等二缺指名用手本移會應否

作缺於十四日接吏部文選司手本云查得吏科左給事中杜篤祐給假在未奉作缺

明旨之先自應聽限滿赴京供職奉堂批照議同覆到科今滿漢字原手本見存臣科可察而調元亦捏臣科爲背

旨又謂吏部司臣爲背

旨則滿漢堂司等官前作看語後批照議者豈盡背旨之人乎近見內院陞補官員一疏內將從前給假官俱

題明作缺臣即同臣科滿洲臣議云前日吏部兩

次俱說不出缺今內院已

題明出缺應照內院事例移明吏部定爲畫一之規又用滿漢字手本移會作缺見今部中回咨未到臣科原以內院題奉

欽依爲式樣而反以臣爲聾聵爲欺罔爲甘心爲背旨調元真良心滅絕之甚者且調元疏云內院何常問吏部此言愈謬矣夫內院之例本衙門題陞亦本衙門題缺臣科之例陞轉事故吏部題缺臣科止於照缺咨人此所以再三移會吏部也調元亦係科臣當諳科例反云待線索於他人

乎且杜篤祐一事臣科滿漢臣花上吳赤哈等共議於署臣有何支吾彌縫有何私心庇護字字可問如謂臣與杜篤祐有鄉情豈吏部滿漢堂司等官及臣科滿漢官皆與杜篤祐有鄉情乎况調元恨臣原非一日調元四月內上俯抒愚忠一疏諸臣在科同看公揭內有

聖躬出入無常頻臨三院等語臣率云意固戇直言亦關係但接見大臣乃

皇上下交之美事也此段未可輕進調元聞之怫然變色恨已伏矣又杜篤祐給假調元係兵科左

應挨陞刑科都後兵科都缺出調元與臣在
天安門內同行向臣云刑科也罷了只是嫌刑科
書辦太疲本又多每到日夕還不得出衙門味
此數語明示意於臣覲陞兵都故以臣科咨伊
陞刑都爲大恨又刑科外抄送吏科甚遲昨吏
部取打死人命一抄係七月十七日本下查八
月十四日尚未送到吏科臣云外抄一月不發
有何緣故令書辦持咨催取太急此又臣開罪
於調元者積此數端宜其相報之速也總之臣
任事太真口直招怨臣自知之今調元誣臣爲

背

旨欺

君違例徇私誑爲大言以聳

天聽調元挾私之肝肺昭然共見六垣有是非部院
有公議難逃我

皇上洞鑒中矣臣謹將始末情節

奏明伏祈

勅下吏部都察院一併察議緣述屢次情節字逾常
格統祈

聖明鑒宥施行謹具奏

聞奉

聖旨着一併察議具奏該部院知道



